

# ጴሁዳ ኪኢቶ ዓይያ ካር

ሃይ ጴሁዳ ኪኢታ ፃኣፒንቴህሂ ዩሱሴ ጉሙርቂ ጎናሲ ዔኪባኣ ዓሲታፆ ዩሱሴ ጉሙርቂ ዔኬ ዓሶ ማላ፣ ሉኡዙሞ ባሶ ኬኤዛ ዓሶይዳፓ ዩሱሴ ጉሙርቂ ጎናሲ ዔኬ ዓሳ ፔና ካፓንዳጉዲ ዔርዛኒኬ፤ ማሊፃ ላምዓሳ ጳደርሴ ኪኢቶ ማላ፣ ሃኖ ዳኮ ኪኢቶ ማፃኣፖ ፃኣፔ ዓህ ፔቴና ጌኤዦንሂም ፆኦሲ ዒንጌ ጉሙርቂፆ ኮሺ ዔያታ ዓርቃንዳጉዲ ሃሃ ሃኖ ኪኢቶ ናባባ ዓሳኣ ዔራንዳጉዲ ኬኤዛኔ።

## ማፃኣፔላ ዲማ ዲማ ዓርቂ ባኮ

ዓይያ ካር 1-2

ሉኡዙሞና ዔርዛ ዓሶኮ ማሊፆንታ ዔርዚፆንታ ሃሃ ዔያቶም ጊኢጊንቴ ባኮ 3-16

ዩሱሴ ጉሙርቃ ዓሶም ዒንጊንቴ ዘር 17-23

ፆኦሲ ጋላቲህ 24-25

1 ዩሱሴ ኪሪሰቶሴም ማዳያ ማዔ ያይቆኦ ጌርሲ ጴሁዳይዳፓ፡- ፆኦሲ ዔኤሌዘንሂም፤ ሃሃ ፆኦሲ ዓዳሂ ናሽኬዘንሂም፤ ሃሃ ዩሱሴ ኪሪሰቶሴና ካፒንቲ ዓኣዘንሂም ቢያ፡-

2 ማኣሪህና ኮሹሞና ሃሃ ናሹሞና ዒንሂም ዲቦንጎ።

## ሉኡዙሞ ባኣዚ ዔርዛ ዓሶ

3 ታ ዒጊኖንሂዮቴ! ኦም ቢያሂም ማዔ ዳቂንቶ ዛሎ ታ ዒንሂም ፃኣፓኒ ጌዔኔ፣ ሃሂ ላሚ ሸርቱሞ ጎይሂና ጌኤዦ ዓሶም ፔቴና ዒንጊንቴ ጉሙርቂፆ ዛሎ ደዲ ዒንሂ ፆልታንዳጉዲ ዘር ታ ዒንሂም ፃኣፓንዳያ ታና ኮይሴኔ።

4 ዔያቶይዳ ፆጊንታንዳያ ማዔፃ ሚርጌ ፆዳኮ ቤርታ ፃኣፒንቴያ ማዔ ፔቴ ፔቴ ዓሳ ዒንሂኮ ባኣኮ ዳሚና ፑኒ ጌሌኔ፤ ዔያታ ኦ ፆኦዛሂኮ ኮሹሞ ዒንጊፆ ፔ ሱኡካ ዓይሃ ጎይፆ ላኣሚ ላኣሚ ሸራ ጎሜ ዓሲኬ፤ ዒዚ ኦኡኮ ሌሊ ኦና ፆይሃያና ኦ ጊዳ ጎዳታያ ማዔ ዩሱሴ ኪሪሰቶሴያ ዔያታ «ዔሩሞሴ» ጋዓኔ።

5 ዩያ ቢያ ዒንሂ ቤርታዲ ዔራያ ማዔቶሞ፣ ፆኦሲ ፔ ዳር ጊብፆ ዓጮይዳፓ ኬሲ ዳቂሹሂና ዒዛ ጉሙርቂባኣ ዓሶ ጊንፆፓ ባይዜያ ማዔሂ ታ ዒንሂም ጳቂሃኒ ኮዓኔ።

1:1 ማቴ. 13:55፤ ማር. 6:3። 1:5 ኬሲ. ማፃ 12:51፤ ፓይ. ማፃ 14:29-30።

6 ይያጉዲ ሃሣ ፔኤኮ ቦንቾ ካፒ ዒዲ ፔ ቤዘዋ ሃሼ ያኑሲ ኪኢታንቾ ማሉዋቱ፤ ያኑሲ ዔያቶ ጴኤፖ ዋጎ ኬሎ ሄላንዳኣና ናንገና ቱኡሲዳ፤ ሃሣ ጴኤፒ ዲሚዳ ጌሢ ካፒ ዓኣኔ።

7 ዬዳ ጎይያ ሶዶሚና ጋሞራና ሃሣ ኮይሎይዳ ዓኣ ካታማኣ ማቾ ሃሣ ዓኒ ማዒባኣ ዓሲና ላሂ ጎሜ ማዳኔ፤ ቤርታ ማዢንታፓ ዓርቃያ ዓኣ ዋጎ ላኣሚ ዲማ ጎይሢና ዔያታ ዋላ ላሄኔ። ዬያሮ ዔያታ ናንገና ባይቁዋ ታሞይዳ ሚቹንታንዳ ዓሶም ኮኣኪንሢ ማዔኔ።

8 ይያጉዲ ዬና ዓሳ ዓውቲ ጌዔ ገንሢ ዓኣዲ ዓኣዲ ፔ ዓሽኮ ዒኢሳኔ፤ ያኑሲኮዋ ዓኣ ቢታንቶ ቦሃኔ፤ ሃሣ ጫሪንጮይዳ ቦንቻ ዓኣ ማዢንቶዋ ዔያታ ጫሽካኔ።

9 ያኑሲ ኪኢታንቾኮ ሱኡጋሢ ሚካዔኤሌ ጎይሢታያ ሙሴኮ ሌዘ ዘሎ ፃላሄና ዋላ ማርሜያና «ያኑሲ ኔና ጎርንጎ» ጌዔያፓዓቱም ጫሽኪ ዒዘይዳ ዎጋኒ ጫርቁባኣሴ።

10 ዬያታ ዓሳ ጋዓንቱ ፔ ቶኦኪና ዔራኒ ዳንዳዒባኣ ጫሽ ጫሽካኔ፤ ማላሢባኣ ቦፖጉዲ ፔኤኮ ማዢንታፓ ዔያታ ዔራ ባኣዚ ዓኣያ ማዔቶዋ ዬያና ዋላ ባይቃንዳኔ።

11 ቃኣዔኤሌ ዓኣዴ ጎይያ ዔያታ ዓኣዴሢር፣ ሚኢሾሮ ጌዒ ባኣላኣሜ ደቢንቱ ጎይያ ዔያታኣ ደቢንቱሢር ሃሣ ቆራሂ ጎይሢ ዒዲ ማኬሢጉዲ ዔያታኣ ዒዲ ማኪ ባይቁሢር ዔያቶ ባዴዔ!

12 ዬያታ ዓሳ ቦርሲንቲ ባኣያና ዋሊና ዓማሊ ዒንሢ ናሹሞና ቡኪንቲ ሙዓ ሙዖ ባኣኮይዳ ጴዲ ዒንሢኮ ዲቆ ማዓኔ፤ ዔያታ ማላሢ ፔ ቶኦኮሮ ሌሊኬ፤ ሃሣ ዔያታ ዢባሬና ሂዒንታያ ዒርዚባኣ ሻኣሬጉዴያኬ። ሚፃ ዓኣፓ ዎዶናታያ ዓኣፒ ጴዲዎያ፣ ፃጳፓ ቱገንቲ ሜሊ ሃይቁ ሚሢጉዴያኬ።

13 ዔያቶኮ ቦርሲሳ ማዶ ዓዳ ዱባጉዲ ዔያታ ዱባሳያ ጴኤፖ ዢባርና ሂዒንቲ ዓገፃ ባዘ ዋኣያጉዴያኬ፤ ሃሣ ዔያቶ ሻኔ ዲሚ ናንገና ካፓያ፣ ሴካ ሃንጋ ጌዒ ላቢንቲ ሃንታ ዢኦጋሢጉዴያኬ።

14 ዓዳኣሚይዳፓ ዓርቃያ ላንካሳ ሾይንቲ ማዔ ሄናኬ ዬያቶ ዓሶ ዘሎ፦ «ሃይሾ ጎዳሢ ሚርጌ ሺያና ፓይዲንታ ጌኤሺ ዓሲና ዋላ ሙካንዳኔ።

15 ዒዚ ሙካንዳሢያ ዓሲ ቢያይዳ ዎጋኒ፣ ዓይሢንቶ ዒዳ ዓሶና ጎሞ ዓሶና ቢያ ዔያታ ደቢንቲ ማዶ ማዶ ቢያሢና ሃሣ ያኑሲ ጫሽኬ ጫዢና ቢያ ፔጋሳኒኬ» ጌዒ ያኑሲ ማላሢ ኬኤዜኔ።

---

1:7 ማዢ. ማፃ 19:1-24። 1:9 ዳኣኔ. 10:13፤21፤12:1፤ ዮሃ. ያፔጳ 12:7፤ ላሚ. ዎማ 34:6፤ ዛካ. 3:2። 1:11 ማዢ. ማፃ 4:3-8፤ ፓይ. ማፃ 22:1-35፤ 16:1-35። 1:14 ማዢ. ማፃ 5:18፤21-24።

16 ዬያታ ዓሳ ቢያ ዎዴ ጉንዲማያ፤ ሃሣ ፔቲ ባኣዚናታዎ ዎዛዲዎያኬ፤ ዔያቶኮ ፑርቲዎ ሱኡኮ ሌሊ ኩንሣያ ዳንጋኣ ዔያቶኮ ያቶርዎ ዑኡሲና ኩሚያኬ፤ ዬያጉዲ ዔያታ ፔና ማኣዳንዳ ባኣዚ ሌሊ ኮዒ ኮዒ ዓሲ ገሻኔ።

**ለቲሢና ዘርና**

17 ዒንሢ ጋዓንቲ ዒጊናንሢዮቲ! ኑ ጎዳሢ ዬሱሰ ኪሪሰቶሴኮ ዳኪንቲዘንሢ ሃያኮ ቤርታ ኬኤዜ ቃኣሎ ጳቂሁዎቲ።

18 ዔያታ ኬኤዛዎ፡- «ዎዳኮ ጋፒንያይዳ ፔ ሸና ዓይሤ ሱኡኮ ኩንሣ፡ ገሻ ዓሲ ሙካንዳኔ» ዒንሢም ገዔኔ።

19 ዔያታ ዓሲ ዎሊፓ ፓቃያ፡ ዓሲ ማሊሢ ሱኡኬ ኩንሣያ፤ ሃሣ ዓያና ጌኤሺያ ዔያቶይዳ ባኣ ዓሲኬ።

20 ዒንሢ ጋዓንቲ ዒጊናንሢዮቲ! ቢያፓ ዑሣ ዓኣዴ ጌኤሺ ማዔ ጉሙርቁያና ዒንሢ ቶኦኮ ጌኤሻኒ ማሉዎቲ፤ ዓያና ጌኤሺ ዎልቁናኣ ሺኢቁዎቲ።

21 ኑ ጎዳ ዬሱሰ ኪሪሰቶሴ ፔኤኮ ማኣሪያና ናንጊና ናንጊ ሸምፓ ዒንሢም ዒንጋንዳጉዲ ካፒ ካፒ ዒንሢ ቶኦኮ ያኦሲ ናሹዎ ጋርይዳ ማሢ ዓርቁዎቲ።

22 «ዬይ ማዓንዳ?» ጌዒ ዓልታ ዓሶም ናሹዎና ኮሺ ባኣዚ ማዲዎቲ፤

23 ፔቲ ፔቲ ዓሶ ታሞይዳፓ ዓይሲ ዳቂሹዎቲ፤ ሃንጎ ዓሶ ሚጨንቲሢና ዒጊጨ ማኣሩዎቲ፤ ያዲ ማዔቶዎ ዔያቶኮ ጎሞና ዒኢቲ ዑያ ሄሌ ዓፒላታዎ ዓቲዋንቲ ፒኢሉዎቲ።

**ያኦሲ ጋላቲሢ**

24 ዒንሢ ሎኦሙዎጉዲ ማሃኒና ቦርሲሳ ባኣዚ ባኣያ ማሃኒ ዎዛና ዒዛኮ ቦንቾ ቤርቶ ዒንሢ ሺኢሻኒ ዳንዳዓሢም፡

25 ዒዚ ሌሊ ኑና ዳቂሻሢ ማዔ ያኦዛሢም፡ ኑ ጎዳሢ ዬሱሰ ኪሪሰቶሴ ዛሎና ሚናፓ ዓርቃዎ፡ ሃሢያ፡ ናንጊና ቦንቾና ዴኤፑሞና፡ ዎልቁና ቢታንቶና ቢያ ዒዛም ማዎንጎ! ዓኣሚን።

**ጌኤዢ ማጻሕፍት**  
**The Holy Bible in the Maale language of Ethiopia,**  
**using Ethiopic script**

copyright © 2008 The Word for the World International and The Bible Society of Ethiopia

Language: Maale (Male)

Translation by: The Word for the World

Contributor: Bible Society of Ethiopia

**ጌኤዢ ማጻሕፍት**

Maale Full Bible

The Word For The World International

Bible Society of Ethiopia

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-13

---

PDF generated using Haiola and XeLaTeX on 13 May 2025 from source files dated 13 May 2025

bbcfb90a-3ae3-5452-983d-6c4c02375929